

Thursday, April 10, 2025

Time - 2:30pm - 2:35pm

REGIONAL NEWS BULLETIN

(MIDDAY)

MARKET

Nimin khan UD&PA minister Pu K. Sapdanga hova thukhawm chuan Aizawl hmun hrang hranga chawhmeh leh thil dang zawrh dan mumal zawka siam ni se, an ti.

He tah hian Aizawl khaw chhunga bazar, kawngpui sir leh motor hnunga chawhmeh leh thil zawrh dan te uluk taka sawiho a ni a. Heng thil zawrh dan te hi zir chianna mumal tak kalpui tur a ruahmanna siam a ni a. Aizawl khawpui a lo felfai leh thianghlim zawkna atan ruahmanna felfai zawk siam ni se, chawhmeh leh thildang zawrh dan chu mumal taka kalpui zel tura ruahman tha zawk siam ni se tih a ni. Sawihona-ah hian Aizawl Mayor Pu Lalrinenga Sailo, Commerce & Industries secretary Dr. Lalzirmawia Chhangte leh UD&PA secretary Pu Lalmalsawma Pachuau, Secretary-te bakah AMC leh UD&PA Department-a official pawimawh te an tel bawk.



DMs, ASF

Siaha district magistrate Pu VL Hruaizela Khiangte chuan Siaha khawpui chu African Swine Fever (ASF) vawk pulhri lenna (infected area) a puan a a nih tak avangin khapna thupek a chhuah.

District magistrate chuan Siaha district huamchhungah ram dang, state dang leh district dang atangin vawk, vawksa leh vawksa atanga eitur siam chi reng reng lakluh a khap. Siaha district huamchhunga ASF pulhri lenna hmun ang reng reng atanga lakchhuah a khap bawk. Siaha district huamchhung, khua leh khaw inkarah vawk, vawksa leh vawksa atanga eitur siam chi reng reng inlak pawh tawn a khap bawk a. Vawk damlo talh khap tlat a ni a, dah hran vat tur a ni. Vawk damlo nei te'n a ranglamin district vety hospital emaw mahni khua/veng VFA leh thuneitu dangte hnenah hriattir vat tur a ni. Vawk thi leh suat tur nei te chuan AH & Vety Department ah in report ngei ngei tur leh vawk thi leh suat te reng reng chu paih mai lovin Disinfectants, Chinai, Bleaching etc. nen thuk taka phum tur a ni.

Vawk pulhri lenna ni lo-ah chuan vawk hrisel talh duh an awm chuan a hrisel ngei a ni tih finfiahna lehkhah neite'n khawtlang hruaitute hriatpuina in an talh thei ang.

Hemi dan bawhchhetute chu Bharatiya Nyaya Sanhita,(BNS) 2023 section 223 hmanga hrem an ni ang a. He thupek hian chhuah a nih atanga thla hnih (2) chhung a huam dawn a ni.

Hetiang tho hian nimin khan Hnahthial district magistrate Pi K. Vanlalruati chuan Hnahthial district huamchhunga hman tur thupek a chhuah ve bawk.



PROJECT LEAP

Lunglei District bawrhsap ruahmannaa Lunglei District-a vohbikte chawi kanna tur hma lakna - Project LEAP (Lunglei's Empowerment for Access and Equity for all Persons) hnuaia hma lakna tur sawi hovin nimin khan District Bawrhsap Pi Navneet Mann hovin a hna thawh pindanah an thukhawm.

Pi Navneet Mann chuan Project LEAP kalpuina turin Lunglei District chhungah vohbik, persons with disabilities (PwD) te zirchianna kalpui a nih tawh thu sawiin, Lunglei Municipal Council (LMC) huam chhungah leh Rural Development (RD) block hrang hrangah doctor-te leh thawktute'n kal chilhin vohbikte tan hriselna dinhmun endikna (health assessment camp) buatsaih tum a nih thu leh Unique Disability ID (UDID) card la nei lote hnenah UDID card pawh sem nghal tum a nih thu a sawi.

LMC huam chhunga PwD-te tana health camp buatsaih hun atan April ni 22 atanga ni 26 chhung ruat a ni a. Lunglei Civil Hospital hotute kutah mawhphurhna nghah a ni a. Health camp buatsaih tur chungchang hi mipuite hriatah zau taka puanzar ni se tih niin, an veng chhunga vohbikte'n health camp an pan theih na'na buaipui turin local council-te ngen ni se tih a ni bawk a. RD block hrang hranga health camp buatsaih tur ruahmanna chu Block Development Officer theuhte kutah dah a ni a. Health camp buatsaih turah hian Artificial Limbs Manufacturing Corporation of India (ALIMCO) te pawh tel tura ngen ni se, tih a ni bawk.

Lunglei District chhunga khaw hmuh lama harsatna nei (visually challenged students with 40% benchmark disability) zirlai sawm hnenah smart tablet sem tura ruahman niin, District Education Office-in zirlaite zingah zirchianna buatsaihin a dawng thei tur lo zawng se, tih a ni a. An khua/veng chhunga vohbik dinhmun leh list la theh lut lo village level committee-te chu hriattirna pek leh ni se, tih a ni bawk.



SPORTS

Nimin khan Sports & Youth Services Minister of State Pu Lalnghinglova Hmar leh Railway Sports Promotion Board (RSPB) secretary Pu Prem Chand Lochab leh a thawhpuite chu New Delhi-a Rail Bhawan-ah an inkawm a, Mizoram sawrkar leh RSPB te thawhdun theihna hrang hrang an sawi dun.

Pu Lalnghinglova Hmar chuan India infiammite tan leh Indian sports hmasawanna'n Indian Railways chu a hlu hle tih a sawi a. Mizoram sawrkarin Olympic 2036 hmathlir nei chung a 'Bana Kaih - Empowering Mizoram Sports (EMS)' a kalpui tur sawifiahin, state pum huap sports coaching leh talent zawn chhuah kalpui turah coach an indaih loh avangin infiammi national level-a khel pha thin, 'Past Champion Athlete' te hman tangkai an ni ang dawn a ni tiin Indian Railways coach-te nen thawho a duh thu a thlen a. EMS hnuaia coach leh Past Champion Athlete-te training pe turin Indian Railways coach/trainer thate Mizoramah chahluh an duh tih a sawi a, RSPB Secretary pawhin tihhlawhtlin ngei a tum tur thu a lo hrilh a ni.

Tun atanga rei lo teah Sairang thleng rel a lut dawn a, Indian Railways tan sports leh thil dangah Mizorama hmalakna tur kawng a inhawng zau sawt dawn a. Mizoram hmasawna turah Indian Railways nena thawkdun turin sawrkar chu a inhawng reng tih Pu Lalnghinglova Hmar chuan RSPB Secretary a hrilh a, RSPB hnuaia Mizo infiammite an luh theih dan tur an sawiho a, Mizoramah ngei sawi chhonzawm turin an rawt bawk.

Sports Minister-in a sawm angin, April 26-a huaihawt tur ‘Aizawl International Half Marathon’ ah Indian Railways runner leh infiammi an tel ngei na'n hma a lak tur thu Pu Prem Chand Lochab chuan a sawi a. Mizoram infiammite dinhmun (level) hriat na'n leh hmasawna'n sports discipline thlan bikah Indian Railways team nen inelna buatsaih thin nise an ti bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar hi puan leh a ni ang.

